





مركز الانطلاقة للدراسات

ALENTILAQAH RESEARCH CENTER (A.R.C)



يحررها خالد غنام أبو عدنان - استراليا

موائد الرحمن الرمضانية في فلسطين



مسجد المولوية أو التكية المولوية

مسجد أثري يعود تاريخه إلى الحقبة العثمانية في فلسطين. يقع داخل أسوار البلدة القديمة لمدينة القدس. يُنسب هذا المسجد إلى إحدى الطرق الصوفية وهي الطريقة المولوية، ويرجع تاريخ إنشائه إلى القرن العاشر الهجري، حيث أنشأه أحد أمراء القدس (خداوند كار بك) سنة 995 هـ / 1586 م. يذكر أن الطريقة المولوية التي تبنتها الدولة العثمانية أسسها جلال الدين الرومي الشاعر المشهور في قونية ببلاد الأناضول

من الكنايات الشعبية

جس على دمك: أي توقف عن مضايقتي  
حسب التساهيل: أي أعمل جهدي بالعمل ولكن بدون وعود لإتمامه  
حسك عينك: أي تهديد قوي ووعيد بقلع العين وإسالة الدم  
حط العقدة بالمشار: أي توقف عن العمل لأسباب تافهة



## حكاوي الشاطر حسن : تأليف خالد غنّام أبوعدنان : الشاطر حسن وأخته عزيّة

في زمانه كان في فلاح قلاعي يشتغل بأرض الباشا وكان اسمه أبو حسن، وكان عنده ولدين حسن وحسين وعنده بنت اسمها عزية، وكانوا إولاده بعدهم صغار، وإمهم كانت ترعاهم وتعمل صواني وسلات قش وتبيعهن بالسوق. وكان أبو حسن بحرث البيدر بثور كبير، وكان هذا الثور عنيد كثير وما بحرث إلا بالضرب، ومرة صار الثور يرافس ودار بده يهجم على أبو حسن، ووقع أبو حسن على الأرض ودبك الثور بنص صدره، سحب حاله أبو حسن بده يشرد بس الثور كان لاحقه، قام أبو حسن خبط الفاس بنص صباحه، بس الثور من حلاة الروح راح نطح أبو حسن بصدرة وفاتت قرونه بين عظام أبو حسن، وماتوا الاثنين فوق بعض، ووقت الغدا استنفقوا القلاعية أبو حسن وراحوا سحبوه تحت العريشة ووصل الخبر للباشا، قام الباشا حكم على حسن وحسين يشتغلوا سُخرة بلا مصاري عشر سنين ويناموا نواظير بالمغارة اللي براس الجبل، وإم حسن تخدم بيته كمان أما عزية فكانت بعدها باللفة، كل هذا عشرين يسدوا حق الثور اللي قتله أبوهم.

كانت أم حسن كل جمعة تروح تنام ليلة عند أولادها وتغسلهم أو اعيمهم وتعملهن زوادة لأسبوع، وكانت عزية تكيف لما تكون مع إخوانه وظلها تلعب حوليهم، ولما صار عمرها عشر سنين قالت لإمها أنا بدي أروح أسكن مع إخواني وشوف طلباتهم، وراحت المغارة وقدمها عملت تقيّة نار يعني موقدة طبخ جابت حجرين كبار وحوّطت إنيالهم بصرار صوان وبالنص حطت كرمية حطب وحولها غرزت تكسات يعني عيدان خشب خميلة هاي اللي بتولع بسرعة، وجابت كم كوكيشة يعني عيدان خشب مش ناشفة كثير وهاي اللي بولع بس طرفها فوقاني، لأنه شغلة التكسة تحريك النار وكثّ الصفة اللي هو رماد الحط عشرين ما تخمد النار. وصارت تطبخ عليها مجردة وسليقة وتحوس من اللي بتلقطه من خضار الخلا، أما الخبز فكانت تجيبه من عند إمها.

مرة من المرات كانت عزية بدها تطبخ سباخ بحمص، وكانت ناقعة الحمصات بالملي، وإلا ما شافت إلا أرنية لونه أبيض وعيونه حمر مثل الدم، كان دابكة فوق لجن الحمص وقاعدة بتوكل فيه، إجت بدها تبعتها قامت خبطها بنص صباحها وما فقدت حالها إلا المساويات وإخوتها برشوا عليها مي، وقالتهن عن الأرنية، وحلف حسن وحسين إنهم يتعشوا على الأرنية وراحوا يدوروا عليها حولين المغارة، ولما طلوعوا لاقوها نائمة تحت شجرة دوم وقاعدة بتشخر، إجا حسن بده يضربها بالفاس وإلا قام طارت وحط فوق شجرة الدوم، وقالتهن إذا بتقربوا كمان خطوة بسخطكم سخلين، قام حسين رجع لورا وقال لحسن إرجع هذه جنينة، بس الشاطر حسن كان دمه فاير وقالها ليش ضربتها أختي رح أقطع راسك، وهجم على شجر الدوم، وإلا الأرنية زطت عليهم حب دوم وإلا صاروا سخلين وصارن يماعن. عزية من أول ما طلع الضو راحت دور على إختها، وإلا شافت السخلين على باب المغارة، ما سألت فيهن وطشّت بالخلا بس السخلين ضلوا وراها يماعن، وهي تنادي على إختها، وإلا طلعت الأرنية من حفرتها وقالتها، ليش فيقتيني من نومي إختك وراكي أنا سخطهم سخلين لأنهم كانوا بدهم يذبونني، صارت عزية تنترجى فيها وتقولها ما كنت أعرف مقامك يا حاكمة الفلا وإحنا أهل خلا ما بنعرف سواديكم حلي سحرهم وأنا خدامتك، قام قالت الأرنية إنها بدها منها تروح تجيب عشرة غصون سنديان، وكمان تعملها طبخة سبانخ بحمص. طاحت عزية على البلد وحكت لأمها اللي صار ففاتت وبأيدها عزية عند الباشا وطلبت منه عشرة غصون سنديان، وكان ابن الباشا واقف وقال لأبوه إنه عزية شلبية وبدو إياها، فقال الباشا بأعطيك الغصون وعزية بدها تصير لإبني، فقالت عزية موافقة بس أول أروح أوصل الغصون.

رجعت على المغارة وحاست السبانخ وطبخت فوّه الحمص وقعدت تنظر الأرنية، وسخلين حولها بوكلن بالعشب الناشف، والعصريات إجت الأرنية وصارت توكل بالزبدية نا خلصتها، بعدينش قالت لعزية هلقيت إربطها سخلين كل واحد بصخرة كبيرة، وأضربي كل واحد فيهن لحد ما تكسري على بدن كل واحد خمس غصون سنديان، وإن بتضربي بتقولي هاي أرنية الفلا عمرك ما تمد إيدك عليها، وأوعي تقولي أخ ولا تدمعي، وبلشت عزية بالسخل الأول وصارت تضرب وتحكي زي ما قالت الأرنية، ولما انكسر الغصن الخامس انقلب السخل لزوبعة غبرة وطلع منها حسين وجسمه كله جروح، وصارت إداوي فيه، وبعديها مسكت الغصون بلشت تضرب بالسخل الثاني، بس هذا السخل صارت دموعها معيبي وجهه ونواحه عالي، فبعد ما كسرت الغصن الرابع، نزلت دمعتها وقالت معلش يا أخوي تحمل كمان غصن، وما قالت كلمتها وإلا انقلب السخل لجحش إسمر وصار يناهق، وقالت الأرنية لعزية لأنك شفقتي عليه رح يضل حمار ويوكل قتل طول عمره وفاتت الأرنية على حفرتها.

المسا راحت عزية وساحبة وراها الجحش، ولما فاتت على بيت الباشا، قالت لابن الباشا إنه هذا الجحش لازم يضل عايش معها، وافق ابن الباشا وعملها عرس مطنطن وشال ديون أهلها، بس كان إلهها ثلاث ضراير وصارن يغارن منها لأنه ابن الباشا دايم دوم بدلل فيها، فقامن اتفنن يذبنها في البير المهجور، وهذا اللي صار ما هي عزية كانت طيوبية وما حسبت حساب كيدهن. لما وقعت عزية بالبير إجت فوق جاعد خروف، وصارت تبخر حولها ما لقت اشي تضوي فيه، بعد شوي سمعت صوت جحش يناهق، وصارت تنادي على حسن، صار حسن يجبلها أغراض عملت تقيّة وصارت تشوف حولها، وصارت تطبخ من اللي يظطه الجحش إلهها، وراح جحش لعند أخوه حسين وصار يسحب فيه لحد ما وصلوا لعند البير، قام حسين زط حبل وسحب عزية وأخذها هي والجحش وراحوا على المغارة.

صار الجحش يطلع كل يوم ويناهق تحت شجرة الدوم، وعزية تلحقه وترجعوا على المغارة، وبعد كم يوم صفت عزية بشجرة الدوم وقالت للجحش يعني عبالك توكل دوم، وراحت لقطت شوية دوم ولما نزلت صار الجحش يناهق بدوش إياها توكل عزية من الدوم ولا هو كمان بده يوكل منها قام حطت الدوم بالخرج وراحت على المغارة، وصار الجحش يحكيها تطبخ الدوم وتحط عليه شطة الفلفل، وضله يغلي الدوم والجحش ما بده حدا يوكل منه، ولما صار وقت العصريات خلى عزية تحمل زبدية الدوم المغلي بالشطة ودارته بحفرة الأرنية، وصارت الأرنية تصيح دخيلكم بتوب، خلص رح أترك الخلا إلكم، بس الجحش صار يناهق، فقالت له ورح ترجع يا حسن أحلى شب بالندبا، وهون صار الجحش زوبعة غبرة وطلع منها الشاطر حسن وصار يعبط بأخته عزية ومن بعدها ما حدا شاف الأرنية إم عيون حمر بخلا القرية وعاشوا بسلام وأمان.

## أكلات كديمة: الخويا أو خويّة



تصنع من خبز كماج مفتوت ثم يقلى بالسمن وبعدها يوضع في صحن مجور، ويصب فوقه شراب القرفة المحلى بالسكر ويزين بالجوز واللوز والصنوبر.

وغالباً ما تقدم هذه الأكلة للمرأة النفساء.

## صور التراثية



## الأغاز شعرية



خبروني أي شيء \* أوسع ما فيه فمه \*  
وابنه في بطنه \* برفسه ويكلمه \*  
وقد علا صياحه \* فلم يجد من يرحمه.

(يد الهاون)


ختياره وما إليها عيون \* وبدها مين يطعمها \*  
بتمشي بسرعة وقمح الكون \* مش معقول يكفيها.  
(الطاحونة)

رب حمراء أنتنا \* وهي في أحسن حلة \*  
حلوة الريق حلال \* دمها في كل حلة \*  
نصفها بدر فإن \* قسمتها صارت أهلة.  
(البطيخة)

وحدة تقول.....

رحت عند دكتور وصف لي دواء  
وقالي تأخذين حبة بعد الاكل

كنت بسأله يعني ٩ مرات باليوم  
بس استحييت





## هوية الأدب وأدب الهوية- دراسات في الفولكلور والأدب الفلسطيني

الكتاب الصادر عن دار الشروق للنشر والتوزيع، عمان- الأردن. تأليف د. جريس نعيم خوري، في مقدمة كتابه كتب: "أن من يتابع تطور الفكر الفلسطيني منذ بدايات القرن العشرين إلى يومنا هذا يجد أنه على الدوام ارتبط بهاجس البحث عن الهوية، وبلورة السمات المتميزة للشعب الفلسطيني، والحفاظ على التراث الفلسطيني الخاص بشقيقه الرسمي والشعبي، كنوع من الصراع الغريزي على البقاء"

